

abundant pituita crassa. Huius febris accessio non repente, sed sensim inuadit hominem, qua corporis extrema duntaxat refrigerantur absque vlllo rigore concussionéque corporis: dormiendi inexpugnabilis cupiditas cum totius corporis grauitate excitatur. Plerunque etiam ipso accessionis initio animus egrotantis vel deficit, vel syncope corripitur. Dein sensim & ægrè calor augetur, magna certè inæqualitate: quia æger modò calorem, modò frigus percipit. Calor autem in toto corpore accensus non acris, sed halituosus tangenti occurrit: qui quidem nudare corpus non cogit, nec huc & illuc iactare: sitim non vehementem accersit: paucòque sudore lento desinit. Pulsus accessionis initio paruus est & rarus: postea verò celer euadit. Urina primis diebus tenuis & aquosa cernitur ob pituitæ copiam, quæ valde meatus obstruit & calorem natium obterit: postea concocto pituitoso humore, crassa turbidæque ac rubra redditur. Aluus liquida crudæque ac pituitosa deijcit. Huius febris tota accessio octodecim horarum est, intermissio verò sex, quæ raro pura & integra existit. Ad pituitosarum febrium genus refertur epiala febris per quam in quavis particula corporis calor & frigus percipiuntur. Huius febris causa continens pituita acida, aut vitrea leniter putrescens putatur est.